

Morning Dogri (NSD) Bulletin

13-02-2026

आकाशवाणी

खबरां नाटयपाल सिंह कोला,

खास-खास खबरां:-

1. संसद दे दौनें सदने च एल्लै चला रदे बजट इजलास गी वक्फा पांदे होई अज्ज मुअतल करी दिता जाग। संसद हून अगले महीने दी तरीक गी परतियै शुरु होग। 9
2. भारतीय रिजर्व बैंक नै करसाने गी मते बड्डे दोआर-कर्जे देने च सहायता करने लेई किसान क्रेडिट कार्ड दे नियमें दी समीक्षा कीती गई।
3. अज्ज दुनिया भरै च विश्व रेडियो दिवस मनाया जा' रदा ऐ।
4. बंगलादेश च बी.एन.पी. नै संसदीय चुनाएं च बहुमत हासल करने दा दावा कीता ऐ। अधिकारिक परिणाम अजे औना ऐ।
5. महीने भर चलने आले खेड्ड महोत्सव दिल्ली खेल महाकुम्भ अज्ज राष्ट्रीय राजधानी दिल्ली च शुरु होगन।
6. ते मर्दे दे टी-20 क्रिकेट विश्व कप च गुप-ए दे कल नर्मी दिल्ली च खेड्डे गेदे मैच च भारत नै नामीबिया गी 93 रन्जे कन्ने हरांदे होई टी-20 विश्व कप गी सारे शा बड्डी जित दर्ज कीती ऐ।

<><><><><><>

Budget Session

संसद दे दौनें सदने च एल्लै चला रदा बजट इजलास गी वक्फा पांदे होई अज्ज मुअतल करी दिता जाग। संसद हून अगले महीने दी 9 तरीक गी परतियै शुरु होग। बजट इजलास इस बारी दंऊ चरणे च शुरु होआ- जेदे च पैहला गेड राष्ट्रपति द्रौपदी मुरमू हुंदे आसेया संसद दे सांझे इजलास च भाषण कन्ने 28 जनवरी गी शुरु होआ। एदा दूआ गेड 2 अप्रैल थमां शुरु होग। खजाना निर्मला सीतारमण होरे कल राज्यसभा च केन्द्रीय बजट उप्पर होई दी बैहस दा परता दिता। उनें आखेया जे सरकार दा मुख ध्यान आर्थिक तरक्की ते समग्र विकास कन्ने भारत गी आत्मनिर्भर बनाने पर ऐ। उनें आखेया जे मंहगाई गी चिगड़ा रक्खदे होई बी मती प्रगति दर गी बरकरार रक्खेया जा रदा ऐ।

<><><><><><>

Shivraj Chowhan-Rahul Gandhi

राई-बाई मंत्री शिवराज चौहान हों लोक्सभा च विपक्ष दे लीडर राहुल गांधी हुंदी नुक्ताचीनी करदे होई आखेया जे उनेंगी मुल्खे दे करसाने दी बिंद बी परवाह नई ऐ। इक सोशल मीडिया पोस्ट च श्री चौहान हों आखेया जे राहुल गांधी होर करसाने गी बाइख्तयार नई होन देना चाहंदे ते बार-बार राष्ट्र विरोधी ब्यान दिंदे न। श्री चौहान हों आखेया जे प्रधानमंत्री नरेन्द्र मोदी होर लगातार करसाने दी भलाई-बेहतरी गी प्राथमिकता देया रदे न ते सरकार दा हर इक बड्डा फैसला करसाने दे हिते गी ध्यानै च रक्खदे होई लैता जंदा ऐ। तोंआई उद्योग मंत्री पीयूष गोयल हों बी राहुल गांधी हुंदी नुक्ताचीनी करदे होई आखेया जे ओ करसाने गी गलत ब्यानबाजी करदे होई गुमराह करने दी कोशिश करा रदे न।

<><><><><><>

RBI Draft Norms

भारतीय रिजर्व बैंक नै जंदे रोज किसान क्रेडिट कार्ड योजना आस्तै संशोधन मसौदा नियम जारी कीते न- जिंदे च मिट्टी परीक्षण- मौसम पुर्वानुमान ते जैविक प्रमाणीकरण जनेहियां राई-बाई आहली तकनीकी पैहले पर होने आहले खर्चे गी पात्र राई-बाई दोआर घटकें च शामिल करने दा प्रस्ताव ऐ। मसौदे दे मुताबक- प्रति दोआरकर्ता 2 लक्ख रपे तगर दे राई-बाई ते सरबंधी दोआरे लेई सुरक्षित ते मार्जिन जरूरते च छूट दिती गई ऐ।

<><><><><><>

15th Fin. Comm

सरकार नै 5एं राज्ये च ग्रामीण मकामी निकाएं गी मजबूत बनाने लेई 2025-26 बरे आस्तै 15में वित्त आयोग दे अनबद्ध अनुदान दी दूई किश्त गी मंजूरी देई दिती ऐ- जेहड़ी 3 जहार 324 करोड़ रपे शा मती ऐ। एह 5 राज्य न- बिहार- हरियाणा- हिमाचल प्रदेश- उत्तर प्रदेश ते पश्चिम बंगाल। पंचैती राजी मंत्रालय नै आखेया ऐ जे इस अनबद्ध ग्रांट दा इस्तमाल थाहरे सरबंधी जरूरते लेई कीता जाग।

<><><><><><>

PM -Seva Teerth

प्रधानमंत्री नरेन्द्र मोदी होर अज्ज राष्ट्रीय राजधानी दिल्ली च सेवा तीर्थ नां कन्नै इमारत परां परदा गोआइगंन। प्रधानमंत्री होर सेवा तीर्थ- ते कर्तव्य भवन 1 ते 2 दा बी उदघाटन करगंन ते संजा लै लोकें अग्गे भाषण देगंन। सेवा तीर्थ च प्रधानमंत्री दफतर- राष्ट्रीय सुरक्षा कौंसल सचिवालय ते मंत्रीमंडल सचिवालय होगंन जेड़े पैहले बक्ख-बक्ख थाहरें पर हुंदे हे।



World Radio Day

अज्ज दुनिया भरें च विश्व रेडियो दिवस मनाया जा रदा ऐ। अज्जै दे दिन गी 1946 च संयुक्त राष्ट्र रेडियो दी स्थापना दी याद च मनाया जंदा ऐ। इस बरे दा विशे सार ऐ- रेडियो ते मसनुई ज्ञान- AI is a Tool not Voice. विश्व रेडियो दिवस गी मनाने लेई छत्तीसगढ़ च आकाशवाणी रायपुर यूनेस्को कन्नै रलियै विश्व रेडियो दिवस सम्मेलन आयोजित करा रदा ऐ। इस सम्मेलन दौरान इस गल्ला उप्पर विचार-विमर्श कीता जाग जे कियां आर्टिफिशल इंटेलिजेंस रेडियो दे प्रसारण च होर मता योगदान करी सकदी ऐ।



Prog. Announcement

आकाशवाणी जम्मू दे प्रादेशिक समाचर एकांश आसेया अज्ज यानि 13 फरवरी गी विश्व रेडियो दिवस दे मौके पर 25एं मिन्टें दा इक विशेष कार्यक्रम प्रसारित कीता जाग- जेदा विषे होग- “रेडियो ते आर्टिफिशल इंटेलिजेंस” . 13 फरवरी गी दपैहरी 12 बजे प्रसारित होने आहले इस कार्यक्रम च स्हाड़े परोहने होगंन- वरिष्ठ प्रसारक ते साबका स्टेशन डायरेक्टर शमीन्द्र कुमार जेहड़े इस विशे पर अपने माहिराना विचार सांझे करगंन। इस कार्यक्रम दी मेजबानी साहड़े न्यूज एंकर जगमोहन शर्मा हुंदे आसेया कीती जाग। एह कार्यक्रम मीडियम वेव 303 मीटर यानि 990 किलोहर्टज ते एफ.एम 100 अशारिया 3 मैगाहर्टज पर प्रसारत कीता जाहग।



Bangladesh Counting

अनाधिकारिक गिनतरी ते पार्टी दे मते मुजब बंगलादेश नेशनलिस्ट पार्टी(बी.एन.पी.) 13में राष्ट्रीय चुनाव च निर्णायक जित हासल करने दी बतै पर ऐ ते 299 संसदीय सीटें चा 208 सीटें पर बड्डलै साड्डे 7 बजे तगर अगगै ऐ। बी.एन.पी. नै इस नतीजें गी भारी सार्वजनिक जनादेश करार दिंदे होई दो-तिहाई बहुमत हासल करने दा भरोसा जताया ऐ। तारिक रहमान ते मिर्जा फखरुल सनें सीनियर लीडरें ते बी.एन.पी. दे केंई होर शीर्ष हस्तियें समेत अपनी-अपनी सीटें पर जित हासल कीती ऐ। उआं अधिकारिक नतीजें दी घोषणा अजें नेंई कीती गई ऐ।

<><><><><><>

Delhi Khel Mahakumbh

खेलो दिल्ली- “दिल्ली खेल महाकुम्भ” अज्जै थमां शुरु होआरदा ऐ- जेहदा मकसद राष्ट्रीय राजधानी च इक जीवंत खेड्ड संस्कृति गी मजबूत करना ते बढ़ावा देना ऐ। खेड्ड हस्तियें ते फिटनेस कोचें कन्नै इस कार्यक्रम दे बारे च चर्चा च बोलदे होई दिल्ली दे मंत्री आशीष सूद होरें आखेया सरकार फुटबाल- बास्केटबॉल- वॉलीबॉल ते कब्ड्डी समेत सत प्रमुख खेड्डें च प्रतियोगिताएं दा आयोजन करोग। उनें आखेया जे इस आयोजन कन्नै पूरी दिल्ली च खेड्डें दे बुनियादी ढांचे दा मुल्यांकन ते सुधार करने च बी मदद थहोग। मंत्री होरें आखेया जे सरकार दा मकसद महीने भर चलने आले इस खेड्ड उत्सव च 30 जहार शा मते खडारियें दी शमूलियत गी यकीनी बनाना ऐ।

<><><><><><>

Cricket

टी-20 क्रिकेट विश्व कप च कल रातीं ग्रुप-ए दे मैच च भारत नै नामीबिया गी 93 रन्ज कन्नै रहाई दिता। भारत दी टी-20 विश्व कप च रन्जे दे साहबै एह सब्भनें शा बड्डी जित ऐ। भारत नै निर्धारित 20एं ओवरें च 9 विकटें पर 209 रन्ज बनाए। लक्ष दा पिच्छा करदे होई नामीबिया 10 गेंदा बाकी रौहन्दे होई 116 रन्ज पर ऑल आउट होई गई। भारत दे खडारी ईशान किशान नै 24एं गेंदें च 61 रन्ज दी शानदारी पारी खेड्डी। एहदे शा पैहले कल प्रतियोगिता दे बाकी होए दे मैचें च श्रीलंका नै ओमान गी 105 रन्ज कन्नै रहाया ते इटली नै नेपाल गी 10 विकटें कन्नै मात दिती।

<><><><><><>